



咳

講著「咳」！有哪儕毋會咳？有哪儕毋識咳？「咳」係偲俚撫身最平常，乜係最直接个一隻反應，有麼个好見奇！人當想咳个時節敢忍得核？就算想忍，做得忍幾久？用偲个經驗來講，係想咳个時節強強忍等毋咳，該等加下絕對會還較咳，所以，想咳个時節，就愛遵行咳个禮儀，先尋便一隻毋會影響公眾个地方來咳，恁樣，正毋會失人禮，自家乜做得試著較鬆爽。

照理講，「咳」係一種當平常个身體反應，對儕儕就共樣，毋過，因為有新冠病毒來作躁，害大家一聽啊著有人咳，就會較注意兜，係聽著有人多咳加幾聲，該大家个目珠定著會擎到金金金，摻咳个人從頭到腳巡加幾輪，偲佢哪位有爭差無？若係緊咳个人無戴等嘴揞仔，該脣頭个人大體斯會緊張到煞煞閃籬閃壁，就驚毋堵好會分人遛著病，有成時，緊咳个人係無做好個人个衛生，還有可能會分人檢舉。唉！仰會變到恁得人驚？對咳个人來講，咳該下就盡無奈何、盡艱苦咧，咳過忒，還愛再過分公眾疑疑狐狐、指指點點，想著就實在傷人个心。

其實，想真兜，人會咳，無一定全全係因為病疾。有時節，話講忒久、睭比賽喊加油忒出力、笑忒大聲、分薰跔著，也係久無食水、喉嚨眩燥癢，乜會咳，還有嗽水、吞東西無細義哽著，乜會咳，該造成咳个理由有恁多，仰使一聽啊著有人咳，就緊張到會死呢？這也難怪大體人會有恁樣个心理，反轉來想，新冠病毒傳恁遽，遛著个人恁多，有哪儕聽著人咳會毋驚、會毋多加注意个呢？又有幾多儕做得分清楚，該咳个人係因為麼个原因正咳个？這係現下个社會氣氛，個人最好愛尊重大家个睭法，一方面多自重，保護好自家个身體，另外，就係咳个時節，愛有公共衛生个觀念摻做法。

從防疫个角度來講，「咳」毋單淨係個人个身體反應摻自由定定，乜係影響公共衛生盡大个行為。比論講，係自家寒著，儘採滿片咳、也毋戴等嘴揞仔，該咳出來个口涎水就有可能會噴著屋下人、同事，害佢兜乜寒著，又遛分還較多个人，所以，自家想咳个時節就愛先有預防个觀念，還愛摻嘴揞仔戴起來，大家做得先尊重別人，共隻道理，別儕想咳个時節，正會尊重偲俚。

作者：林伯殷

☆詞彙學習☆

【咳】kied`：咳嗽。

【見奇】gien` ki：特別。

【鬆爽】sung` song`：舒服。

【作躁】zog` cau`：擾亂到心神不寧。

【爭差】zang` ca`：相差、差別。

【嘴揞仔】zhe` em` er`：口罩。

【閃籬閃壁】sham` li sham` biag`：躲躲藏藏。

【遛著病】che` do` piang`：感染到疾病。

【疑疑狐狐】ngi ngi fu fu：懷疑。

【分薰跔著】bun` fun` kiug do`：被煙嗆到。